

四庫全書

史部

欽定四庫全書

史部

譚襄敏奏議卷二

詳校官國子監司業臣納麟寶

編修臣裴謙覆勛

總校官檢討臣何思鈞

校對官主事臣陳文樞

謄錄監生臣王官

欽定四庫全書

史部六

譚襄敏奏議

詔令奏議類二

奏議之屬

提要

臣等謹案譚襄敏奏議十卷明譚綸撰綸字子理宜黃人嘉靖甲辰進士官至兵部尚書襄敏其謚也事迹具明史本傳此編乃其歷官疏草分為三集曰閩稿嘉靖四十二年再起為右僉都御史巡撫福建時所上也曰蜀

稿嘉靖四十四年起為陝西巡撫會大足民作亂陷七城調任四川以後所上也曰薊遼
稿隆慶元年至四年由兵部右侍郎進左侍郎兼右僉都御史總督薊遼保定軍務時所上也史稱綸沈毅知兵為台州知府時即與戚繼光立束伍法練兵破倭寇擒斬殆盡官
浙江海道副使時又連破之再起為浙江右叅政時破饒平賊林朝曦調福建叅政時郡

縣多為倭所陷力戰恢復闔地以平官四川
巡撫時滅雲南叛酋鳳繼祖于會理總督兩
廣時岑岡賊江月照等望風而降朝廷倚以
辦賊遇警輒調居官無淹歲在薊遼與戚繼
光協力邊辦三衛諸部迄不敢南牧終始兵
事垂三十年積首功二萬一千五百計其功
名不在王守仁下而儒者顧艷稱守仁則以
守仁聚徒講學羽翼者衆也今特錄是集以

見其謀畫之大畧庶不沒其實焉乾隆四十六年十二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

譚襄敏奏議卷上

明 譚綸 撰

恭謝天恩疏

嘉靖四十二年
二月望日題

臣前任浙江布政使司右叅政兼按察司副使奉勅巡
海嘉靖四十年三月十九日以父憂離任本年九月間
因廣寇流突江西伏蒙皇上以全革復臣原職事寧伏
蒙皇上許臣終制四十二年正月間閩倭猖獗兵部又

題奉欽依復臣原職時臣讀禮甫及大祥伏惟大君制命時事孔棘臣子之私其何敢邳臣隨於三月初一日割情就道催取泐兵至本月二十八日進至建陽縣蒙聖恩陞臣都察院右僉都御史提督軍務兼巡撫福建臣領咨望闕叩頭謝恩訖臣念閩海之寇盤據已久徵兵方至易將臨敵誠恐交代之間人心弛懈因致誤事臣即破除常格凡事關戰守未代之先一面施行尋於四月十一日入省准前任巡撫游震得將闕防符驗旗

牌并文卷與臣交代領事外臣惟兵戎為國之大事巡撫乃今之重臣必遴選之極精始付托之有效竊念臣以一介微賤濫厠班行才本不逮於中人學實未通乎軍旅始由郎署而出守徒負恩私繼秉憲節以臨戎深慚尸素忽冒知兵之譽祇緣任事之愚兩被命而墨綬已非所據薦承恩而秉鉞孰謂其宜且八閩之受倭今幾十載而易巡撫者四姓曾未有終彼皆抱竒傑之才尚無救地方之患如臣菲劣抑又何勝聞命自天措躬

無地欲感恩而圖奮實有志而未能惟無改其實心或粗得乎勝筭更假之以時日誓竭愚忠不與賊共戴于以開八閩之太平紓九重之南顧臣之願也亦臣之分也臣下情無任感激屏營之至

乞恩終制疏

淞江等處承宣布政使司右叅政兼按察司副使譚綸奏為江西地方流賊已靖仰遵成命懇乞天恩放回終制以廣聖孝事竊念臣以一介草茅叨逢盛世仕幾廿

年官階三品揣分弗堪圖報靡及不幸喪父苦居甫及
兩月即遭流寇之來毀形扶襯竄伏林莽艱難備歷有
死無生伏蒙皇上憫念元元橫被鋒鏑屢下哀痛之詔
亟興問罪之師江西臣庶皆焚香額天祝願皇上萬壽
無疆顧臣不自意驚下得以墨纒備數金革聞命兢惕
措躬無所會時事戒嚴天威霆震臣烏烏躑躅之私未
敢上請而犬馬奔走之力因效前驅今幸皇上玄威廣
運廟筭萬全渠寇授首三省底寧老終少長咸無失所

之嗟孝子慈孫盡遂人倫之願獨臣三年有其懷之愛
既與人同而一日愈於己之心未獲自盡誠宇宙內之
罪人為聖明朝之棄物恭蒙明旨准臣以暫起復及奉
欽依許臣以事寧守制天語昭如日星君恩侔於天地
臣雖粉骨碎身無以為報伏望皇上念臣哀苦惻怛之
情恤臣無所解於其心之私勅下該部仰遵成命放臣
回籍守制待制終之日遵例聽用則臣自此有生之年
皆是效忠之日臣下情無任殞越懇切之至

水陸官兵勦殺新舊倭寇捷音疏

三月十九日題

嘉靖四十二年三月十八日倭賊進至建陽巡按福建
監察御史李邦珍趣臣督戰臣啟行間據兵備副使汪
道昆呈稱奉文會同副總兵官戚繼光選募浙兵於本
年三月十七日入境行至浦城據報新倭四百餘徒自
長樂縣地方登岸劄營小址窺伺省城本道先發前部
六營把總胡守仁褚應宿率兵兼程赴省賊聞兵至隨
奔福清縣岱后地方總兵官劉顯俞大猷各發官兵分

伏要路截擊四月初十日提督軍門右僉都御史游震
得親督胡守仁等三營勁兵徑趨福清縣追勦賊聞大
兵壓境夤夜潛由江口逃遯本月十五日總兵官劉顯
會同俞大猷各發把總郭成與領江西援兵把總樂垓
及領兵名色把總包堂郭文劉添慶劉添榮劉招桂龔
仁朱相指揮魏宗瀚等率兵分伏要路本日卯時官兵
齊出奮擊俘斬首級一百四十五顆生擒一十六名奪
回被擄男婦數百又准總兵官俞大猷報稱本鎮一面

督發中軍指揮魏宗瀚統兵合勦一面督令名色把總
朱相帶兵前往可通平海要路開溝斷橋以截去路仍
令各兵埋伏俟賊渡水邀擊至日卯時前賊果突大營
劉兵放銃為號伏兵四起劉兵從左衝擊我兵從右夾
攻賊衆大敗我兵乘勝衝殺追至開溝處所朱相伏兵
齊起賊無去路擒斬過半餘黨勢窮奔投入海不能取
級我兵全勝各收回營本鎮部下名色把總俞義重俞
義安等官兵共斬獲首級四十一顆四月十九日准總

兵劉顯開稱本月十八日把總許朝光稱平海倭賊知
新賊殺盡即驚慌下船欲走因光防範嚴謹不敢開行
至十六日夜颶風大作光將哨船駕至南向避風大船
摘留平海繫泊賊欺船少乘風搖駕大小船共三十二
隻一齊開洋光即棄艇急追連犂賊船四隻亂放發煩
火器銃沉二隻焚燒三隻賊見勢蹙將財帛婦女拋棄
入水投奔老岸比因昏夜不能盡殺止斬獲真倭四十
九顆奪回被擄男女一百三十名口兵夫陣亡五人被

傷一十一人餘倭復回舊巢見在督兵團勦除首級人
口解發紀驗外具報到臣為照福建地方被倭荼毒年
甚一年民既凋殘兵糧俱困每遇賊至無所措手以致
延蔓日深蕩平無計茲蒙皇上憫念元元俯從諸臣所
請遣將徵兵荐出內帑濟給糧餉用是軍聲稍振賊勢
消沮在陸則新來之寇悉已授首在水則舟楫之賊尋
報成擒是皆仰仗皇上玄威遠鎮廟筭萬全將士用命
所致也

飛報異常捷音疏

四月二十
二日題

嘉靖四十二年四月二十一日臣督兵駐總兵俞大猷
營內據整飭福州兵備按察司副使汪道昆報稱四月
初八等日督募浙兵入省監督總兵劉顯俞大猷副總
兵戚繼光三大營官兵尅期進剿原襲破興化府城大
勢倭寇本月十九日兵至興化地方探得前賊移據平
海衛總兵官劉顯俞大猷分屯渚林養威蓄銳以圖大
舉今義士許朝光劉文敬各督舟師邀諸海上賊坐是

因窮探知戚副總兵同本道統督大兵入境遂拔營前
至酒林迤南據險結巢犄角迎敵二十日蒙本院督同
本道與興泉兵備叅議萬民英布政司戴罪殺賊左叅
政翁時器親至渚林會集三大營官兵面議機宜分定
哨道以副總兵戚繼光統督把總胡守仁等部下官兵
為中哨衝鋒以總兵都督劉顯統督把總郭成等部下
兵為左哨而以江西巡撫都御史胡松所遣領援兵把
總樂頊與前福建軍門都御史游震得所發標兵把總

陳倉等兵佐之以總兵都督俞大猷統督南贛軍門都御史陸穗調發指揮魏宗瀚名色把總朱相等部下兵為右哨而以淞江巡撫都御史趙炳然所遣領援兵把總楊文與本院發與叅政翁時器監督領標兵把總陳其可蔣伯清傅應嘉部下等兵佐之仍懸賞衝鋒銀二萬兩以鼓作士氣定以二十一日各照分定哨道刻期進攻軍門各道隨軍監督本日丑時中哨官兵仍分三路魚貫而進直薄賊巢賊亦分道擁出拒敵賊首躍馬

當先我兵勇氣益倍三哨官兵一時並進賊勢不支奔
遼回巢各兵乘勝攻打益急賊復併入大巢死守各兵
四面圍合因風縱火血戰破巢賊衆敗匿房中或焚死
或刃傷自相枕籍積尸充雷難以數計間以遁避山海
我兵隨處奮擊墮崖蹈海死者數亦難計止據在陣敵
殺生擒真倭首功二千二百餘名顆器械稱是奪回被
擄男婦三千餘人衛所印信一十五顆即今福州以南
郡縣並無一賊臣惟蠢爾倭奴突如內犯襲我郡衛辱

我冠裳虔劉我人民占據我城池流毒已經數月被害
奚啻一方今乃仰仗皇上玄威廣運廟謨審固文武同
心將士用命遂使莫敢誰何之寇不崇朝而投首既陷
被據之城以一鼓而克復全閩按堵萬姓歡騰捷書露
布皆稽首籲天祝願皇上萬壽無疆臣待罪督撫仰念
聖明萬里南顧臣寢食靡寧今幸有此非常之捷除有
功效勞人員另行查叙外恭先馳報上慰聖懷

飛報捷音疏

五月初十日題

嘉靖四十二年四月二十四日臣在平海渚林班師據
福清縣報二十三日清晨有賊船三隻約賊二百餘徒
在神前澳登岸臣即遣標下名色把總蔣伯清楊文統
領所部濶兵自平海進至蒜嶺驛地方伏截仍委兵備
副使汪道昆戴罪殺賊叅政翁時器監督次日前賊果
由彼路而來伏兵四起前後夾擊賊衆奪氣我兵鏖戰
益力斬獲真級七十八顆被掠男婦當從寬貸令地方
領回二十七日又報倭賊五百餘徒突至北嶺逼近省

城左布政使曾于拱按察使萬衣督遣瀾兵胡世等五百名前去截殺斬獲首級二十顆餘賊星夜退遯連江地方去訖未敢近薄省城皆胡世一戰之功五月初三日據福州兵備道副使汪道昆呈稱二十六夜賊聞平海倭賊剿滅不候風潮潛自開遯水寨官兵船瞭見舉火為號二枝齊起四更時分追至東湧外洋捕盜黃怡等四船首挫賊鋒衝沈倭船四隻生擒真倭二十七名斬獲首級二十顆奪獲被掠人口一十名遇夜昏黑浪

湧溺死不計難盡取級又據鎮東衛指揮同知趙國柱
報稱本澳探有倭船九隻拋泊外洋國柱率捕盜兵船
及萬安所千戶夏雋等船於四月二十六日前去草嶼
洋中奮勇夾攻衝沈倭船四隻賊各潰敗趙國柱捕兵
生擒真倭一十五名斬獲倭首一十二顆千戶夏雋兵
生擒真倭五名斬獲首級二顆千戶許勳親斬倭首級
一顆家丁許四等生擒真倭二名千戶張淮親擒生倭
一名部兵張漢等生擒真倭三名斬獲首級一顆其餘

賊船五隻蓬艎櫓艇俱已衝壞雖脫遯遠洋勢必沈沒等因五月五日又據該道呈稱本道自平海大捷班師復蒙本院委督副總兵戚繼光部兵進剿連江等處倭寇五月二日到連江先差哨官王寧帶兵潘大德等哨至湯嶺遇有倭賊二名在彼窺探大兵消息王寧等併力斬之又探得倭賊四百餘徒屯住馬鼻地方把總傅應嘉帶藤牌手及戚副總兵烏銃手從五虎門先出把截本道會同戚繼光於初三日先發名色把總王如龍

等兵三營直趨羅源防遏北邈仍親督把總胡守仁等
三營為奇兵由左路緣山而進以陳祿等三營為正兵
由右路衝鋒而進賊出奮力死戰我兵左右夾擊血戰
移時擒斬真倭一百五十七名顆奪回被掠幼男二十
三名巢穴船隻俱各焚燬餘賊計蹙邈入海塗溺死無
數訪得前賊原係攻破壽寧政和一起欲往平海合夥
聞被蕩平退回馬鼻今蒙本院方畧一鼓剿滅該縣地
方已平初七日據興化府申報莆田縣海邊有殺散零

賊該生員鄭瑄倡集鄉衆鄭國寶等敵斬真倭首級五顆鄉夫李思敬等斬獲首級二顆仙遊縣鄉兵程竒烈等斬獲倭首一顆擒獲從賊一名本日又據福清縣申稱指揮趙國柱督率捕盜兵船前至後營海洋遇有賊船四隻即乘順風敵衝賊船三隻沈沒百有餘倭一隻脫走外洋生擒真倭二名從賊一名斬獲首級三顆奪回被擄男子二名本縣又差民兵紀憲林文昌等在於新塘地方擒獲散遁零倭一人斬取首級二顆各呈報

到臣除解到首功俱發委官運同劉汝順紀驗生倭取
赴軍門梟示被擄人口放回訖其有功有勞人員查明
之日另行具題外為照各該官兵自平海大捷以來勇
氣百倍至於舟師最為廢弛亦各感奮共興敵愾之心
以是而福清之神前澳懷安之北嶺連江之馬鼻與東
湧草嶼後營等洋莆田靈川里等處各新舊倭賊不旬
日間次第報平水陸擒斬通共三百七十餘級遠近歡
騰地方寧謐是皆仰仗皇上玄威震疊廟堂勝算所致

其福寧沙埕等處小醜見係閩浙夾攻成功計在呼吸間矣

倭寇暫寧條陳善後事宜以圖治安疏

五月二十日題

臣會同總督廣閩都御史張臬巡按福建監察御史李邦珍議照修政貴於及時有備所以無患福建地方邇自乙卯以來倭寇紛紜廣賊並出因之民窮盜起內外騷然馴至興化之事而顛危極矣茲者仰仗聖皇神武赫然一怒次第蕩平八閩之間遂獲寧宇十年之內僅

見一時若不乘此戰勝之暇亟為善後之圖誠恐寇情
叵測事變靡常必待患至而始為之備則後之視今亦
猶今之視昔掣肘多艱噬臍無及臣等用是大懼莫敢
寧處謹稽諸舊典酌之時宜質諸輿論之公叅以一得
之見條列十有二事上塵聖覽寔思患預防之愚忠為
久安長治之至計伏乞勅下該部再加查議請自宸斷
速賜允行則地方幸甚臣愚幸甚

一曰議復寨以扼外洋

照得八閩之地西北阻山東南濱海海中諸國獨
日本最為狡獪藉我姦民乘間內侵不但此時為
然蓋自洪武迄今皆嘗受其患查自福寧南下以
達漳泉置衛凡十一置所凡十四置巡司凡四十
有五以控之於陸又置水寨以防之於海初惟烽
火門南日山浯嶼三寨耳景泰年間增而為五時
則戰艦如雲旌旗相望且哨守皆衛所之軍有司
無供億之費外威內固有自來矣法久人玩武備

漸弛倭患突登舊制盡失為今之計亟宜查復五
水寨之舊每寨設兵船四十隻兵萬三千名五寨
通計用船二百隻用兵六萬五千名以五把總領
之定為五大艖內以舊設烽火門南日山浯嶼三
艖為正兵增設銅山小埕二艖為遊兵而又為之
分信地明斥堠嚴會哨賊寡則各自為戰賊衆則
合力併攻以扼外洋擊來賊為功第一擊去賊次
之失賊弗擊與致賊登岸者查照信地論罪五寨

兵船俱屬總兵官統督監軍道監督未汎之先總會南臺聽統督整搦訓練汎期將及分發哨守汎畢復總會南臺殿最功罪而賞罰之仍整搦訓練以備來汎如此則總覈有經聲勢亦重虛偽盡革實効可臻但立法雖詳振舉在將閩中武弁得人甚艱見今各寨把總僅惟原任守備秦經國尚堪鞭策外他皆用之倉卒之餘率乏勇敢之氣臣等查得見奉欽依陞二級泉州納級副千戶傅應嘉

泉州衛指揮魏宗瀚百戶鄧銓浙江松門衛千戶
羅繼祖皆熟諳海務屢立戰功及照浙江定海等
關把總皆奉欽依以都指揮體統行事閩浙海防
責任惟均合無比照浙江事體請乞勅下該部查
將傳應嘉魏宗瀚等銓補前職但五寨之中又有
緩急而五臣才力亦有大小臣等劑量相宜小埕
為省會門戶宜用傳應嘉蓋本官竒才傑抱將畧
尤優一時武弁無出其右次則烽火門宜用魏宗

瀚次則銅山宜用鄧銓次則浯嶼宜用秦國經次則南日宜用羅繼祖斯則因地用人乃無不勝之患伏乞聖裁

二曰議處兵將以責實効

臣等查得前福建巡撫都御史劉燾分為南北中三路請設三叅將領之軍門標下另設遊擊一員各陳陸兵三千名其經畫亦云備矣但叅遊既難於得人而尾大每至於不掉數年之間未覩成效

職此故也臣惟知兵之將世不多有治標之事難
執一方亦惟隨時措置有益成事而已今照分守
溫處福興副總兵官戚繼光忠誠懋著文武兼資
貌雖不踰中人才則可將十萬南北將官號為節
制之師而收堂堂正正之效者誠未見其比也第
其秩雖都督官纔副總殊未足以展其千里之才
而慰八閩之望臣等謂宜請乞以戚繼光充總兵
官鎮守福興漳泉延建邵武福寧金溫九郡一州

其三路叅將悉改為守備所轄信地俱仍舊章且宜即以戚繼光部下偏裨曉暢兵事屢立戰功者充補其任則在平時既兵知將意將識士情而於臨事如身之使臂臂之使指無不如意誠為計之得者今該臣等查得戚繼光營內見充軍門標下把總納級指揮胡守仁其才則堪中路守備見在領兵納級指揮王如龍其才則堪北路守備但南路守備尚難得人臣等又查得福建都司署都指

揮僉事耿宗元精敏向進合無請乞勅下兵部查
將胡守仁王如龍推中北二路耿宗元以原職帶
管南路各守備職任行令查照原分信地各帶所
部兵夫住劄防禦三路五寨水陸兵將俱屬總兵
官統督監軍道監督容臣等查處堪動官銀於閩
縣南臺地方開設鎮守教場及監督公署在彼聽
其公同調集合營訓練風汛之月乃分布四出聽
各住劄該道分投監督水陸防守蓋無事而合營

團操則號令出於一人而兵有實用臨汛而畫地
分守則水陸備於多算而事有成功誠又計之得
者但本鎮以一人之身轄全閩之廣馭二三萬之
衆若非分任得人焉能巨細畢舉仍應照例添設
坐營都司一員專司調度中軍把總二員職掌旗
鼓統領標兵其人則查有見任北路守備羅章堪
備坐營之任戚繼光部下納級指揮陳濠金科堪
備把總之任就而用之庶幾上下相信任使有人

而軍務為可舉矣再照原議遊擊領兵一枝專任
軍門標下以備往來策應見在遊擊員缺查有江
西南湖守備李超堪以銓補伏乞聖裁

三曰議處客兵以備常戍

照得金台之兵臣與戚繼光居浙頗久勞心訓練
故長於陸戰漳泉福清之間人以下海為業故長
於水戰今淞江不能不用閩兵以備之於水亦猶
福建一時不能不用淞兵以防之於陸蓋其長技

有如南舟北馬既不可以強而同而其應募亦如
遊藝行商實不可以禁而止是固無容別議外但
越省從征勢難久駐而萬衆聚食坐費餉金臣等
因行副總兵官戚繼光監軍副使汪道昆將前客
兵從公詢審願去願留分為上下二班每班務足
九千名上班自今七月初一日為始分布教訓以
防小汛至十月無警放班下班亦自七月初一日
為始差官押送回籍至十月初旬聽各把總統領

上班以防春汛汛畢仍於六月終放還又以前班
兵夫限七月初旬上班以防秋汛年年如此歲歲
更番務以三年為率不許別有變更但出應募每
不為本處有司所喜值其放班因肆凌虐情亦有
之故兵將往往以此為慮伏乞夫語叮嚀淞江巡
撫右侍郎趙炳然通行該管道分及府縣官員務
要一體存恤毋得自分彼此因其應募輒事誅求
致開他釁內有把總等官變亂行伍違誤戍期及

赴他處投用者聽臣等從重叅究拏治如此則陸戰有人閩事自定而瀾之列郡與閩境土相接者亦無唇亡齒寒之患矣伏乞聖裁

四曰團練主兵以固根本

臣惟先年編僉民壯大縣多至五六百名中縣三四百名小縣亦不下百五十二百名每名歲定工食銀七兩二錢近年東南皆給帖聽募人自取蓋有倍收至十一二兩者兵有定數糧有定額所以

揀官軍之散得寓兵於農之意比者屢該言官建議詔下有司團練鄉兵法莫有便於民壯者乃沿習日久本意寔失以有用之錢糧養無籍之棍徒無益實用臣等謂宜將各縣額設民壯責之駐劄守巡兵備該道督責知府知縣巡捕等官通行查出汰其老弱與市井棍徒補以精悍丁壯給以堅甲利兵編成隊伍分為班次一班屬之知縣就便訓練在縣防守一班屬之巡捕官領赴本府團操

每季更番稍均勞逸每府聽臣生委知兵武職一員假以把總名色為之統督知府為之監督公同訓練駐劄該道以時閱視別其勤怠精否而賞罰之務使人人善戰縣縣皆精該道該府該縣等官乃為稱職否則他事雖賢亦以曠官論罪八府一州計可得兵萬二千人小警則各自為戰大警則互相應援如此則糧餉不增戰守有備行之三年即八閩之內可轉弱為強而議罷客兵矣伏乞聖

裁

五曰議處憲臣以重監督

凡用兵既有大將為之統督又必用憲臣為之監督蓋訓練士馬臨陣決戰身先士卒則統督之事也稽察姦弊課殿功罪處置錢糧則監督之事也除水陸守備把總分駐信地料敵出戰則聽臣行駐劄該道分投監督外至於合營團操與大兵進剿大將臨戎必同心文官一員與之終始其事臣

等查得兵備副使汪道昆忠存許國才足投艱素與副總兵官戚繼光雅志匡時協誠任事故去春今夏屢建奇勲武畧文謨並輝窮海今戚繼光既欲其總鎮八閩而汪道昆則伏蒙欽陞二級萬一推遷別省不免有拂羣情伏望聖明軫念遐方剛生神氣勅下該部將汪道昆遵照成命陞授福建按察司按察使協堂請給關防勅書監督全省水陸軍事務與戚繼光同心一德共濟時艱俟其年

勞茂著績用有成超格擢用伏乞聖裁

六曰薦舉賢能以備任使

伏惟為政在於得人而見賢乃可授任方今聖皇
壽考久道化成多士濟濟隨試輒效固不必為官
而擇人也但人之才器各有不同而時屬艱危亦
宜歷試照得福建海道之官最為重任人所畏為
而延建二府素稱善地比以山海之寇屢次傷殘
鄉無完宇民樂從盜撫摩安輯尤貴得人知府周

賢宣年踰一考海道副使邵楨則任滿六年誠恐一旦轉遷別行推補即係賢能克堪重任而於海防事體境內民情豈能一旦熟悉今該臣等查得分守建寧叅議金淞分巡興泉叅議萬民英鹽運司同知劉汝順漳州府同知劉宗寅皆夙抱忠誠才猷茂著素閑軍旅人望共推且居閩既久人情地利無不周知如蒙伏乞勅下該部再加查訪如果臣言不謬遇有前項員缺即將金淞等推補則任

使得人而於殘破地方真有賴矣伏乞聖裁

七曰議處有司以圖治理

臣惟安內攘外必先有司蓋其於民最親而民之
繫望最切如使拊循無術防禦失宜民禍滋矣近
該言官建議吏部題奉欽依通行撫按衙門將各
該地方凡才力不及并貪污不職官員體訪既真
不時叅論蓋誠有見乎此閩中戎事日棘吏治日
非徒以糾察未遑懲創弗及方今外患始息內治

當修有司官員亟宜議處除循良著聞俟其成績
地方簡僻許其自新不得濫及外該臣等查訪得
某官利政教之錄以沽名假餽遺之儀以射利才
足濟貪政多播惡某官性資庸劣志氣卑污當民
窮財盡之際惟峻法而取盈適力誣舉羸之秋獨
興工以求悅政聲湮沒物議沸騰此二臣者貪污
不職所當亟為罷斥者也某年力龍鍾才猷驚鈍
充耳無聞面命猶煩介紹措身無地跬步必假人

扶精力消亡職業曠廢此一臣者年老有疾所當
准令休致者也某官外若可觀中無所取買辦軍
需百求而百不給講求民瘼十問而十不知政已
下移志非尚往此一臣者才力不及所當改調閒
散者也以上地方或為省會門戶而當倭賊之衝
或在山谷隩區而為寇盜之藪安民彌盜必得其
人乞勅該部再加查訪如果臣言不謬將某等罷
斥某官改調別選進士有才力者以補其任庶幾

因地擇材因才授事官守得職而民生有依矣伏
乞聖裁

八曰申明職守以振頑惰

臣惟以民養軍以軍衛民三代以來未之或改國
初沿海地方衛所相望行伍充盈一切軍需莫非
民力故出海有軍烽堠有望隘塞有把城池有備
凡以下捍民患上酬國恩由彼視之因皆分內事
也比來法令廢弛行伍空虛各該衛所官軍大都

桀鷲不馴頑鈍無恥驅之戎行則恍然自失責之
城守則恬若罔聞於是乃復以供賦之民受登陴
之役事之倒置未有甚於此者夫彼以積弱自名
難於不教而戰水陸之防固無望矣至若櫻城自
守力猶可為顧又所養非所用所用非所養則又
馬用養彼為哉查得見行條例凡沿海及腹裏府
州縣與衛所同住一城及衛所自住一城若遇大
敵攻圍不能固守衛所掌印官與專一捕盜官俱

比照守邊將帥失陷城寨者律斬其府州縣掌印官及捕盜官與衛所同住一城者不能竭力協守俱起送吏部降一級別用是則典守之責既有等差而失陷之罰亦有輕重臣請申明前例分別職守如鎮海等衛安海等所官軍自住一城並無居民相錯者責之掌印捕盜官編定精壯食糧官軍署名防守如或老弱即為汰革另選餘丁精壯者補之其不食糧軍餘舍餘既有身家亦要一體編

派協助其餘與府州縣同住一城亦照此例編定
如或城垣寬袤戍守不敷先儘官軍而後以機兵
及居民補其不足假令失事悉照前例分別論罪
設若賊勢重大攻圍緊急許赴附近守備官處請
發援兵援兵聞報必須整擗器械闕支行糧沿途
探哨相機嚮往大約離程三日者即限以十日為
期如遇期而援兵不至因而失陷者領兵官照律
擬罪若倭賊始登攻圍未久援兵已發程期未滿

及為賊所襲原非攻破者俱止罪坐本衛所官員
如此則事有責成人無規避敵愾之勇可作偷惰
之弊可祛而無復覆轍之足虞矣伏乞聖裁

九曰請乞錢糧以救危急

臣自受任以來歷稽往牒福建用兵之始歲費六
十餘萬其後巡撫劉燾當詘乏之時為撙節之議
盡罷兵食祇增軍糧大約一歲計之猶至二十八
萬然而武備俱廢寇患益深而閩遂不支矣及巡

撫游震得繼任之後更議調募稍為調停雖費出
有經亦不下四十二萬顧牘中奏留僅存虛數而
民間窮困無救供需其後失事日殷調兵日至使
非聖明大破常格特發帑銀與取回浙直原借去
銀兩閩事去矣臣始入境則各部調募官兵已近
三萬而各營斬獲功級不啻三千五百有奇解到
帑銀近俱用盡即有未到之數內又除去三萬兩
准作興化修賑等用外以臣等計之僅存一十萬

兩以供來歲之需近該臣等部署水陸分布官兵
共計用兵二萬三千歲用工食銀二十八萬加以
修船給械懸賞衝鋒通計一歲非三十二萬不可
視前巡撫劉燾所議之數止加四萬亦期以實心
行之或可濟事即今汛期相仍歲事孔棘萬一兵
食不繼士氣不張不惟盡棄前功抑恐仍蹈故轍
即臣以身殉國固所甘心國事謂何伏乞皇上留
神於廟算垂成之功終惠於海隅更生之會勅下

該部查浙直江西先年用兵事例就近請發兩淮
鹽課銀十二萬兩兩浙鹽課銀四萬兩兩廣椒木
銀四萬兩責限解發前來聽臣搏節用度散訖繳
報庶足以濟部中待哺之急免日後噬臍之憂伏
乞聖裁

十曰請緩征科以恤凋殘

臣惟貢賦惟正之供催科有司之職市恩曠職謂
之不臣執謂不臣而可為也近因各省拖欠內庫

折銀節該戶部題請通行撫按督催按季開報臣
雖驚下固知內庫為不可缺上用為不可稽欽限
為不可違部議為不可格也近該臣督兵剿賊親
歷福興延建汀邵之間聚落成墟污萊蔽日民間
危急愁苦之狀殆周人所不能喻鄭俠所不能圖
矣以此而責有司招徠之撫字之猶懼不旣將復
使之集流亡督逋負誠不忍出諸口也邇蒙皇上
恩覃溝壑化被海濱大施曠蕩之仁屢下蠲免之

令民間父老猶幸得及於寬政庶幾可保其餘年
使臣不能宣布德意而一切督責有司彼必以應
文逃責之心而為遠禍全身之計有司讐民民讐
有司或以箠楚離心或以耨鋤起釁縱能頭會箕
斂而得不償失將焉用之查得先任詔安縣知縣
龔有成龍巖縣知縣湯相俱各心勞撫字政拙催
科部議以完糧不及分數照例移官一時有司翻
然改慮後該巡撫陸穩奏調龔有成巡撫游震得

奏保湯相於是始知朝廷不輕絕之仁無求備之
議莫不感激思奮精白承休是則部議之殿最吏
治視之以為污隆吏治之污隆民生視之以為休
戚者也如蒙乞勅該部憫念流離稍從寬假福建
一省即七分不完姑免降級四季未報無論稽程
庶遺民得以休息而更生下吏得以紓徐而從事
地方幸甚臣愚幸甚伏乞聖裁

十一曰乞蠲租稅以復流移

臣所謂緩征者謂全省之民也至若興化之莆田
平海福寧之寧德建寧之壽寧政和泉州之晉江
永寧漳州之玄鍾南靖生理久絕喘息未甦以此
而視全省之民又不可以同日語矣先是興化克
復該巡按御史李邦珍發銀六千兩興復水利賑
濟流離近報平海蕩平又該御史林潤請銀三萬
兩為之修城築堰賙貧助耕凡所以為斯民居養
計者至深切也顧自府縣官到任以來日以招集

為事近欲清查戶口歸併都圖乃拊循之急務而民怨征徭之將至又皆轉而之他即使有地可耕有城可守民多疑畏相率流移紛紛未已及查寧德之民久報賊平不願歸復政和壽寧之民猶懷亂畧不樂寧居大率民困則易離民勞則易動事所必至理固然也竊計地方殘破莆田平海為甚寧德壽寧政和次之晉江永寧玄鍾南靖又次之使非廣布之以寬貸之恩明示之以招徠之信即使

龔黃為治民弗能依伏乞免其征科與之更始甚
者三年而後納稅次則二年又次則一年使之甦
息有期歸復可待庶幾漸遂有生之樂益彰無外
之仁但照邇年部議蠲免猶征起運僅免存留是
可以少紓乎災傷之民而不可以緊施於殘破之
地何則水旱之災不常有而豐凶之歲恒相乘即
使年穀不登而舊積可資豐年可望於是持其緩
急為之調停即寬一分民已受賜一分矣乃今故

質蕩廢已往既無所憑生業淪亡將來又無所賴
故雖用其一而緩其二彼惟知有怨而不知有恩
誠能寬之歲月悉為蠲免庶一方可無後憂而三
年或有成効伏乞聖裁

十二日請復額糧以修軍政

臣惟三代以下兵農始分兵制不同用之惟一國
初衆建衛所部署官軍出則從征居則戍守法至
善矣其後承平日久尺籍徒存軍兵不足賴而後

有民兵民兵不足賴而後有募兵制益分而軍費益廣矣查得國初舊設福建馬步官軍四萬八千二百員名夫有軍則有糧有糧則有額要之以境內之賦養境內之兵非自外至者也邇來衛所消耗行伍空虛計其所存曾不能以半較之額數不知其所餘者凡幾何矣當事者綜覈盈虛裒益多寡或那易別用或轉運地方理固然也乃今欲以轉弱為術而為久安長治之謀則必查復額糧振

飭武備計莫出於此者何者醫之攻疾也急則治標緩則治本治標者烏附之類客兵是也治本者參朮之類籍兵是也誠能申明舊章查復定額那移者照舊補足轉輸者照舊取回是四萬八千之軍需可不外索而自足由是而汰其老弱選其丁壯定其部曲時其訓練藉客兵既張之威以作其氣舉客兵已試之法以定其趨俟三年有成由是而罷客兵調募之費減民兵供億之需因地制賦

因賦制兵真救時之長慮修武之善經也以上所
陳訓練主兵查復額糧與前巡撫都御史劉燾先
年建議因兵以求兵因糧以求糧大意相似自非
需之以歲月不免同入於虛文故臣等徵兵請餉
之議恒拳拳焉必期以三年之久庶幾為萬全之
策不然往事具在顛覆相尋臣等雖竭犬馬之愚
亦無救地方之患伏乞聖裁

劉平倭寇叙有功人員懇乞錄賞以勵人心疏

據各兵備道呈報先後水陸官兵通計擒斬新舊倭賊二千二百五十名顆奪回印信十九顆救回男婦二千三百八十名口搶回夷器三千九百六十一件俱發運同劉汝順紀驗印信發興化府收貯給兵及分發府縣貯庫被掠男婦俱發知府易道談審放即今省城以南倭賊盡絕地方底寧前項有功人員相應查叙伏乞具題以彰勸典等因備呈到臣伏照倭寇為患業已有年而郡社為墟舊所未覩師老財竭未收全勝之功而遣

將徵兵仰屋九重之慮今乃衆方入境行未息肩而賊
已覆巢亡不旋踵華夏之氣以紆冠裳之恥盡雪即其
成功之速要非人力能為蓋當其乘夜出海會有風雲
之變賊即受挫還巢而我之四面合攻猶如雲霧之興
賊遂昏迷失守彼之去也若或尼之而我之成也如將
助焉是皆仰仗皇上玄德足以格天而彼蒼所以悔禍
故海隅蒼生咸歌誦乎帝德而封疆臣庶敢妄貪乎天
功他如輔宰之憂先天下運籌于密勿之內本兵之念

切恫瘝決勝於萬里之外言官建議動中機宜司署受
成畢舉群策功皆第一臣何可言臣謹以有事地方之
官各効一臂之力者分別次第敬為皇上陳之在文臣
則有如總督廣閩軍務都御史張梟威望素隆先聲丕
振折衝三省允為元老之壯猷制勝八閩聿樹無前之
偉績膚功一奏人望共推前任巡撫福建都御史今回
籍聽勘游震得秉心淵塞惟志忠誠慨二寇之猖狂而
撫剿並用念八閩之窮困而寢食俱忘蓋賊甫平共仰

誠才之合興城失守豈由提督之踈志已折而不回身
雖危而益厲出其憂憤屢著忠猷雖平海之捷未及躬
逢而爭先之勞皆存成算巡按福建監察御史李邦珍
職在觀風心同濟變覩時事之艱危而推納若已因會
省之震動而彈壓以身議兵議餉皆抗疏以上陳而為
國為民其自任之甚重蓋才堪濟世而義在和衷紀察
惟明成功攸賴南京戶部尚書鮑道明兵部尚書李遂
巡撫江西兵部侍郎胡松巡撫淞江兵部侍郎趙炳然

巡撫南贛兵部侍郎陸穗巡按江西監察御史陳志巡
按浙江監察御史張科仰承明命念切同舟轉餉發兵
先赴公家之急分屯遣將務紓隣國之憂我武維揚成
功有自兵備副使汪道昆才猷揮霍器度恢弘每憂時
而發憤遂被髮而纓冠當巨寇之成擒而倡議請兵早
已有待於今日知名將之間出而推誠相與迄以共濟
乎時艱念其幹蠱之勞精力俱竭即此匪躬之義神明
可通誠文武之全才堪一方之重寄以上諸臣功當首

論內李邦珍破格任事竟廓妖氛游震得無改初心終
崇偉績汪道昆久親戎馬茂著勛猷臣謂李邦珍汪道
昆所宜超格優異游震得謂宜不待勘明復其原職仍
加陞賞者也分巡興泉道福建布政司右叅議萬民英
素開武畧久著英聲推誠任人而衆心豫附監軍給餉
而士馬歡騰原任分守福寧道左叅政翁時罷孳孳為
義念念憂民初志存節省乃展布之未能比身際顛危
遂奮發以從事分督官兵纔當二十之一而斬獲首虜

亦幾二百之多有志竟成遇變弗懈紀功鹽運司同知
劉汝順畏塗給餉不避艱難曠日露衣備嘗險阻士心
同戴民志允孚以上三臣功當並論內劉汝順任怨任
事有為有守所宜從重叙用萬民英分駐泉州連及住
俸此則功非因人罪不在已謂宜開其俸而論其功翁
時器則莅任未久失事亦重雖無桑土之謀實有擒斬
之績此則或功浮於罪或罪浮於功或功過相准非臣
所敢議擬也乃若左布政使曾于拱按察使萬衣副使

邵梗余曰德叅議黃拙僉事金澗曾一經同當禍變均效忠猷或公私之具竭而轉運惟艱或寇盜之猖狂而防禦備至譬如逐鹿咸事張羅又若南京兵部主事賀邦泰南京戶部主事陳思宗間關奉委匍匐餉軍如彼匱乏之時極賴飛輓之助人皆畏避彼獨驅馳又若署福州府運使何思讚建寧府知府王一鶚延平府知府周賢宣漳州府知府桂嘉孝泉州府知府周道光興化府知府易道談福寧州知州夏汝礪福清縣知縣督應

元闕縣知縣鮑宗沂侯官縣知縣任春元都司斷事梁
繼武福州府經歷王坊歷涉多艱輸轉不乏南平縣縣
丞王繼祖福清縣丞陳永倉官聞鑽隨軍給餉策馬
監軍矢石紛紜生死弗避以上諸臣功當優賚內邵梗
余曰德黃肱金淞皆誠與才合而事與願違與福建都
指揮使徐高或因混同而住俸或以帶管而取尤今賊
已伏誅亦宜開其俸而叙其績至於知縣督應元邑當
萬衆之衝百責攸聚縣丞王繼祖陳永倉官聞鑽身任

三軍之役一事無違尤宜錄用以酌其勞者也以武職
言之有如總兵戚繼光鞠躬盡瘁用兵如神馭衆而分
數愈明處勝而機事益密批亢擣虛彼醜畏之如虎除
兇雪恥斯民望之如雲全師奏凱兵不留行一戰成功
賊無噍類豈徒振古之驍將實為當今之虎臣都督僉
事劉顯沈鷲有謀精悍無敵以烏合之兵每用寡而擊
衆負鷹揚之氣能轉弱以為強位高而無愛惜俘獲獨
多戍久而有權宜鬼神莫測時名知重士氣獲伸總兵

俞大猷弘廓深遠渾厚老成論兵如王翦大而非夸馭
衆如子儀威而不猛滅倭有議制勝於未戰之先堅壁
如山破敵得萬全之策居然大將之體久矣丈人之貞
以上諸臣功當首論故或謂賊破興城之後無劉顯抗
之江口則必北突會省震驚無歐陽深抗之溪瀨則必
南竄漳泉瓦解歐陽深既歿俞大猷不來則劉顯勢孤
亦難久駐然非戚繼光節制之兵則推陷廓清之績必
不可成議者以為確論臣請以是而定諸將之功焉至

于中哨把總胡守仁王如龍趙記王輔陳祿葉大正朱
珏張元勳丁茂童子明孫延賢哨官俞志隆張買王寧
伯錢助禮標兵把總陳其可蔣伯清楊文左哨把總郭
成樂塤右哨指揮魏宗瀚千戶楊弘舉舍人朱相俱各
身先士卒手刃倭寇雖其功次有差均之驍雄足賴功
當併論而中哨各官奮勇直立成功神速尤當優異者
也兵部聽差指揮宋連唐安南京戶部委官提舉郁瑠
兵部委官指揮靳文部押糧餉奔馳萬里水路撫民許

朝光截賊海奔獨當一面與領哨把總褚應宿陳倉千
戶杜招督軍指揮盧鼎臣百戶方伯武崔經吳經羅澄
武生傅應嘉千總張玘俱各親行伍而佐軍功冒矢石
而作士氣功當通論而方伯武傅應嘉技藝間習智勇
兼資所當叙用者也戴罪叅將畢高身披草莽志在桑
榆雖不能効死守於連城未破之時而亦能殊死戰於
羣醜將亡之日所當併議領江西援兵叅將梁成愚分
布上郡遙為聲援迄之壽政之寇畏威斂戢旋就誅鋤

所當叙用者也此臣得諸目擊之真實無纖毫之爽伏望皇上勅下該部再加查議如果臣言有據所叙皆真將戚繼光等破格陞賞游震得早賜叙用其他應優異者優異應陞賞者陞賞開俸贖罪者開俸贖罪餘有功員役開載未盡備存紀冊者一應查例施行至如臣者以墨緣而從戎實因人以成事今服雖甫終而心殊未盡宜援三年不計閏之例少伸一日愈於己之私伏乞聖慈俯從臣請及照臣有書辦任相王應麟蓋嘗從臣

於金革之間委身於行陣之後比之常役倍有憂勞仰冀恩私均垂勸典如此則賞不至於踰時勞無微而不錄人心思奮士志益增無煩期月之間坐復東南之盛而倭寇不足平矣

官兵剿平流寇查叅功罪人員以彰勸懲疏

八月五日

題

據各兵備道呈稱流寇悉除等因臣惟頑民梗化妖巫惑民固皆起於兵燹之傷殘迫於饑寒之無賴將帥之

臣既不知兵守令之官復事玩寇萌芽不翦致用斧斤
有自來矣即茲賊首陳明光余珣十等本以龍巖漳平
之編氓敢為張璉廖選之羽翼既編網於鈇鉞復起釁
於耨鋤此龍巖漳平縣官之養寇也當其初起之時衆
止數百及至出境之後尚分二宗乃屢報格殺微功冀
免大兵進剿致使賊兵進合黨與日增流毒三縣衆幾
盈萬此大田沙縣縣官之玩寇也自非巡按御史李邦
珍按行該府久駐彈壓分守叅議黃肱調集錢糧圖為

接濟分巡僉事曾一經親臨營壘監督進止延平府知府周賢宣力持大征身親勒戰及非總兵都督劉顯統督把總楊文蔣伯清陳其可樂塤等直入賊巢分屯血戰則火燃泉達之勢駸駸未已而救焚拯溺之費又不
知當何如其為力也今仰仗玄威震疊廊廟討謨文武同心將士用命流寇山寇一旦掃平四境寧謐以功言則巡按御史李邦珍本以觀風之職每超格於提兵叅議黃肫僉事曾一經曾無一旅之師輒多方以濟變知

府周賢宣治兵轉餉勞苦功高決策運籌機宜屢中總
兵都督劉顯用強弩之末勢當已成之賊鋒一戰破巢
單騎服敵把總楊文蔣伯清陳其可馘賊首惡挫彼選
鋒遂使烏合之衆膽落魄飛奔遯之徒魚沉鳥散以上
各官所當首叙者也撫建叅將梁守愚指揮劉偉凌芝
千戶馬桂武生鄧子龍把總樂塤哨官劉招桂劉添慶
古朝又吳鯨王茂龔仁巡檢孟汶均効驅馳之力共收
斬獲之功推官江南知縣康求德督餉多勞履險不避

以上各官所當次叙者也再照延平衛百戶超環王焜
尤溪縣知縣劉應龍大田縣主簿盧敬典史孫熙楨南
平縣典史何壇雖有勦剿之功難掩失事之罪所當准
贖者也以罪言延平衛指揮某謬總鄉兵之任未聞一
戰之功當刻期而逗遛觀望每臨賊而退縮潛藏所當
提問者也龍巖縣知縣某漳平縣知縣某養虎噬人縱
民為盜既不能安輯於平日又不敢發覺於臨時大田
縣知縣某沙縣知縣某寇方入境力實難支乃飾功以

妄報畏備餉而阻兵以上各官所當罰治者也內知縣
魏文瑞因余珣十既敗而逃回遂能設計以擒獲功與
罪等相應准贖如蒙乞勅該部再加查議如果臣言不
謬將李邦珍超格擢用劉顯黃肱周賢宣楊文蔣伯清
等查例陞賞梁守愚等賞賚王某行巡按御史提問劉
某等各罰治超環等與魏文瑞俱准與贖罪如此庶有
功競勸有罪知懲而地方之太平有日矣

譚襄敏奏議卷一

欽定四庫全書

譚襄敏奏議卷二

明 譚綸 撰

恭謝天恩疏

嘉靖四十二年
九月朔日題

兵部題奉聖旨天地宗廟垂祐八閩底寧各官協謀戮
力擒斬倭寇數多功委可嘉譚綸陞右副都御史賞銀
三十兩紵絲二表裏欽遵備咨賫捧欽賞銀幣到臣謹
焚香望闕叩頭祇領謝恩訖伏以皇威廣運俄收無敵

之功寵命維新薦拜非常之賚貪天是懼戴德奚勝臣
誠恐誠惶頓首頓首竊念臣猥以韋布之賤仰蒙陶鑄之
恩始筮仕於中朝徒勤砥礪再備官於東海有愧章縫
偶值祗金之時誓無孤於壯志誰謂裹革之念遂上徹
於宸衷甫被命而墨纓竟超資而秉鉞念茲平海之績
本自聖神忽拜懋官之榮遽階承貳起家太驟荷賜何
頻夫增秩賜金乃所以表卓異而緇衣敝袴亦必以待
功賢孰謂孤遠之臣乃有殊常之遇茲蓋伏遇皇上德

俾造化明並照臨視民如傷遠邁周文之敬任賢勿貳
上符神禹之艱舞干羽以撫四夷垂衣裳而奠八極徒
以南闕之寇警上厪聖懷遂使白面之書生叨承閭寄
幸一月而三捷詎人力之能為未半載而再遷實功疑
而惟重金分內帑榮耀百朋幣出尚方寵逾三錫念砥
硤之何幸承筐篚以併臨揣分未堪圖報靡及惟爭自
磨濯志切斬鯨益有事綢繆心同衣袵即毫無可取愧
自比於南金而寸有所長期紆憂於北極臣下情無任

激切感戴之至

縣官督兵勦賊奮勇陣亡請卹典以勸忠義疏

據兵備僉事黎元呈稱奉南贛軍門憲牌據所報賊蘇阿普范祖貴梁益巫二妹等即行漳州府同知劉宗寅與汀州府同知尹尚賢會同計剿嚴督各該縣掌印巡捕官調集精兵尅期追捕以靜地方初九日據漳州府同知劉宗寅呈報知縣魏文瑞先將印信牒送主簿管理公同巡檢阮海在縣防守城池本官親自招募永福

等處鄉兵三千餘名迎敵殺賊斬級一十一顆奈賊衆
勢盛本官被賊陣已備報到臣臣看得山寇蘇普等結
黨千百深藏萬山之中屬在三府之界急之則烏散無
蹤緩之則蜂屯為害蓋自昔而然于今為甚誠神人之
共憤宜征伐所必加但屬我海寇方熾而南贛軍門都
御史吳百朋方受害入境伸威營總兵俞大猷又督兵往
潮機宜未便勢難兼舉臣計必俟海賊咸擒之後乃可
移師及之故屢次批行巡視海道副使周賢宣會同漳

南武平等道就近酌議相機而行去後蓋已逆知此賊據險善戰要非鄉兵所能辦矣今據報到前因則賊勢已成事難中止除一面行令漳南該道嚴督同知尹尚賢集見官兵設法擒剿同知劉宗寅知縣劉源湧照依原分信地應援防遏仍聽南贛軍門調度及據一時領兵官員通合有罪但查分守信地相去稍遠剋定期日尚在正月初六日專任搗巢之責同知尹尚賢知縣劉源湧魏文瑞止於分屯把截同知劉宗寅亦止奉文監

督龍岩之兵乃知縣魏文瑞首先遇賊以致陣亡此事在不測而於同事各官實情有可原法難槩坐容臣再行查勘從實參究外為照漳平縣知縣今陣亡魏文瑞雅抱忠猷誠心幹濟矢謀討賊以身任而不辭策馬前驅既深入而益奮於其募兵之始即以印信付諸僚佐誓不俱生當在剋期之先輒以營寨直薄賊巢期於必克卒之首犯賊鋒身膏草野臣子之心久能自靖忠義之氣凜然猶生實丈臣所希有為人心所共惜若不亟請

恩賚無以下慰羣情如蒙伏乞勅下該部再加查議上
請照例褒卹予以慰忠魂于地下勸有位於將來如此
則地方幸甚臣愚幸甚

官兵搗平大勢山寇巢穴飛報全捷疏

監軍按察使汪道昆呈稱賊黨盤據香寮時常出沒流
劫汀漳延邵等處地方屢招屢叛近又賊殺漳平知縣
魏文瑞大肆猖獗奉福建軍門牌調發標下遊擊將軍
李超統督台兵二千自漳州兼程前赴省城謁見巡按

福建監察李御史面授方略即趨延平邀截仍恐所部
兵少牌行本道即取新到湔兵二枝從宜給與錢糧器
械督令前去聽遊擊將軍李超統督分巡武平道監督
赴永安等縣隨賊向往相機截剿等因本道會同戚總
兵調發把總金福景良忠二營官兵督發去後隨據遊
擊將軍李超陸續飛報捷音前來延平衛百戶超環統
領鄉兵進攻北山陸續鵬剿擒斬賊犯余舉七陳福鑑
范椿等賊級一百一十九名顆續報逆賊楊一等因懼

南贛兵威意欲邈入江西地方本道隨調練兵把總樂
塤統領部兵及練兵千戶張豹武生陳世湍統領民兵
俱聽延平府推官江南監督進剿隨該遊擊李超部兵
齊至本道督行延平府多辦火藥器具備用及委南平
縣縣丞王繼祖齋領餉銀前來接濟本道隨營監督閏
二月十六日前賊擄掠地方被樂塤超環領兵斬級五
顆餘賊退屯洪田遊擊李超探得賊首楊一等擁衆四
五千人屯劄洪田勢必奔突永安一帶會同本道分布

以坐營把總蔣伯清名色把總何十之各部兵為前哨
衝鋒而以名色把總李越督陣以名色把總胡世副總
吳昆各部兵為左哨而以千總張九詔督陣以名色把
總施觀定徐全為右哨而以名色把總葉延選督陣本
月二十七日各賊不知大兵已到仍分為二枝一枝攻
打黃龍土寨一枝突至永安縣城外意在掩襲即取道
貢川為長驅計本遊將兵預伏近地待賊一至麾兵四
起賊遂奔遯官兵乘勝追至吉山地方蔣伯清率兵衝

鋒李超催督何十之胡世等兵齊進共擒斬賊級三十
一名顆餘賊奔潰前阻缺河被兵追逼下水淹死者不
計其數餘黨復回洪田屯劄三月初一日南贛官兵接
踵進攻遊擊李超兵取道黃龍村夾擊賊衆大敗逃伏
山林星夜分遁復回香寮老巢遊擊李超督兵窮追奪
回被掠男婦六十名口本遊看得香寮老巢林菁茂密
鳥道險阻距洪田一百六十餘里若使各賊先至舊巢
據險固守後難進攻隨令衆兵乘勝躡踪追至馬家山

劉營次早且薄賊巢各賊原築高大工堡五座堡外四
畔各開池積水堡內多用鳥銃藥弩併力拒敵本遊督
令兵搭造敵臺雲梯連日攻打不下計令兵士決盡池
水每兵各備柴草三担堆積與堡樓並高以便火攻賊懼
初八日巳時送出先鋒鄧朝貴賴忠泓首級欲求招撫
官兵知彼詭計求緩愈加奮勇攻擊至初九日賊勢危
急大夥突出直衝把總胡世兵營要得奪路逃走各該
官兵奮力截殺即時斬首二十餘顆各賊復退入本巢

官兵乘勝攻打又於敵臺上布橋度兵上屋放火焚燒賊死不計其數擒斬一百二十名顆初十日乘勝攻破蓋竹溪寨斬獲首級八十一名顆本日申時火攻祠堂後曹家寨燒死賊徒不計斬獲首級三十三名顆仍有蘇家山大寨離我兵營一百三十里周圍崇山峻嶺視前各寨尤險遊擊李超會同本道議得若照行師節次日行不過五六十里深入彼中既無宿所又或聞風逃遯難以成功必須密令官兵連夜兼程出不意方可決

勝隨於十五日四更督發調到把總金福景良忠新兵
二枝與蔣伯清等兵銜枚疾趨至本日申時抵蘇家山
賊寨攻打各賊多備烏銃矢石據城對敵至二更官兵
奮勇鑿崩城牆約三丈許乘勝入城放火賊不能當除
燒死外擒斬一百五十八名顆各寨俱破餘黨悉平連
前鵬剿通共擒斬五百四十二名顆俱委官紀驗訖各
兵節次攻堡對敵陣亡邵志厚等三十三名被傷何十
之等一百一十五名等因備關到道又關巡視海道節

差漳平縣署印經歷吳豐等宣布三院德意省諭彼中親屬計擒首犯餘悉與免罪有楊一族人楊偕等恐大兵征剽玉石俱焚三月初五日將楊一縛解漳平縣監候等因到道又據紀功官延平府推官江南漳州府同知劉宗寅各呈報相同所據前項有功人員相應照例叙錄陣亡戰傷官兵相應優卹通候查覈明白另冊造報等因及據兵備僉事黎元節將南贛官兵進剿功次亦不下四五百級併報到臣該臣看得香寮逆賊盤據萬

山之中業已有年殺官殃民神人共憤茲者仰仗皇上
神威有赫廟算無遺責成臣等主於速剿而南贛軍門
右僉都御史吳百朋受命惟謹千里督征巡按福建監
察御史李邦珍紀察惟明三軍思奮鎮守總兵官署都
督同知戚繼光遣將誓師而賊已落膽監軍按察司按
察使汪道昆運籌決勝而人知用命以故師不再舉寇
靡孑遺自是地方無鋒鏑之慘良善有耕鑿之望所據
有功效力人員除屬南贛者聽南贛軍門查叙外其在

福建則有如標下遊擊將軍李超有勇知方善謀能斷
冒百里趨利之戒收一鼓成擒之功威如迅雷掩耳不
及勢同破竹迎刃皆解然且避遠師以杜爭功之釁保
善類以弭妄殺之災非惟悉合乎機宜抑亦不愆於節
制即其冠軍之績居然上將之材功當首論者也分巡
武平道僉事曾一經隨營監督而諸險備嘗臨敵制勝
而羣策畢舉日不暇食寧辭軍務之勞師皆宿飽竟致
成功之速巡視海道副使周賢宣恩信素孚士吏咸服

生縛渠魁而兵不血刃拊循良善而民皆按堵此二臣者或以文事而著武畧或用智名而並勇功所當併論者也坐營名色把總蔣伯清督陣名色把總李越材俱精悍氣復飛揚率衆深入不避諸難乘勝長驅遂收全勝功當次論者也延平府推官江南親營陣而甘苦與同給餽餉而飛輓不絕材官用命鬪士伸威功當同論者也各營名色把總胡世何十之金福景良忠副總吳昆徐全戰無不摧攻則必克或首扼突圍之寇或先登

堅壁之巢斬獲既多黨類已絕功當通論者也延建邵
練兵把總樂損提師一旅本難責其成功轉戰千里亦
恒苦於奔命桑榆底績杖杜同聲延平府經歷湯岡南
平縣縣丞王繼祖永安縣縣丞張世鑑領兵百戶超環
或蹈不測之地而轉輸或率未練之兵而克捷功當並
論者也其餘斬獲功級人員相應照例陞賞陣亡戰傷
官兵相應照例優恤恭候命下施行

官兵追剿大勢倭賊三戰三捷地方底寧疏

據監軍按察使汪道昆呈稱原攻圍仙遊縣城大勢倭賊先該本院親臨調度戚總兵統督本道監督各該官兵進剿焚倭三巢殺賊千許餘倭萬數敗遁南下各道督行府縣衛所官員固守城池及調把總傅應嘉兵船由水路策應以防搶船下海尋該署南路守備耿宗元督把總暴以平等官兵斬獲倭級一十一顆平海衛指揮丘昂實省祭楊濂督兵生擒真倭二名白嶺巡檢殷儉督兵斬獲倭級三顆生擒真倭一名仙遊縣鄉兵章

建二等生擒真倭二名前賊遁過晉江南安同安高浦
安海等縣所城堡俱保無虞又該南安縣鄉兵王應文
等生擒真倭一名從賊三名高浦所千戶李如玉督兵
斬獲倭級三顆康店驛夫曾綿等生擒真倭一名又准
僉事李儒烈關稱正月十三日把總滕易下兵在射店
哨賊斬獲倭級一顆都司耿宗元兵在小盈嶺哨賊斬
獲倭級一顆指揮百希周千戶方璽斬獲倭級一顆從
賊三顆鄉兵洪子謙等斬獲賊級一顆又據塘兵胡計

征斬獲倭級一顆鄉兵呂廷信斬獲賊級一顆林體玉
斬獲賊級一顆鄉兵柯和仔斬獲倭級一顆各解道紀
驗訖隨據總兵官戚繼光手本開稱哨得前項殺敗南
遁大夥倭寇屯住同安縣坂尾地方隨獲犯人柯六等
十四名的於二月初三日起營分布哨道預授方略以
北路守備王如龍為左哨中軍坐營把總陳濠為中哨
署南路守備耿宗元為右哨中軍把總吳京淞江軍門
贊畫生員金文通督陣俱于三更自苧溪起營平明到

深青驛設伏先差塘報把總愈世隆錢助禮哨官王漢
沈元就近探得本日寅時賊果起營沿山徑下離我兵
二十里本鎮催發各兵分為四路由仙店大路追至田
裏社王倉坪地方正遇倭賊午炊探知兵到賊擁四五
千衆列陣以待兵見賊勢重大稍亦劄定該守備王如
龍拔刀欲斫領兵把總哨官仍要有刎誓死決戰隨該
名色把總朱九龍丁茂親執招搖當先率兵衝進鏖戰
數合前鋒倭俱被我兵剝殺後陣倭賊不待交鋒望

風披靡先奔過嶺賊先分一枝劄住山頭從傍徑衝陳
濠營該名色把總陳祿張元勳率兵一齊衝進耿宗元
率暴以平楊世胡守臯滕易陳倉由北山邀擊賊皆奔
上大山我兵追上山頂本鎮督戰益力至日將沒賊復
大挫投墜山谷及奔過朝天嶺去訖遇夜收兵並無傷
損通共斬獲倭級一百七十七顆收回被虜男婦三千
餘名口本日鄉兵柯和仔斬獲倭級一顆晉江縣義士
謝畏夫生擒真倭一名俱解興泉道紀驗訖即今城市

鄉落居民始皆畏服兵威無復阻撓又准海道副使周賢宣關稱王倉坪殺敗倭寇奔突長泰野無所掠本道密令義士潘元先於溪北塘寮將塘內盡置毒藥隨據同安縣被擄人劉大同從天寶山迯回供稱各賊中毒倒屍數多賊隨路拆屋焚屍奔遁出漳浦縣地方本道追至該縣分布民兵生擒真倭五名從賊三名斬獲真倭十級從賊一級及拏獲接濟犯人謝贊等三名俱解軍門審驗訖准戚總兵手本開稱前倭遁至漳浦縣無

象鋪地方據蔡丕嶺為巢意欲窺漳浦仍蒙提督軍門
親臨調度巡按李御史就近紀察監軍道分撥部兵前
來協助巡海道隨營監督泉州府同知譚維昂漳州同
知鄧士元臨陣計議漳州府署印同知劉宗寅督運糧
餉二月十五日兵至漳浦縣本鎮備知賊巢據險難乘
但恐一聞兵至夜遁出境愈難追剿即於本日夜分布
哨道以坐營把總陳濠領陳祿陳文澄張元勳各部兵
為中哨衝鋒而吳景督之以北路守備王如龍領楊世

潮丁茂朱九龍各部兵為左哨正兵而以金文通督之以百戶方伯樓大有并遊擊李超領蔣伯清胡世耿宗元暴以平胡仲臯各部兵為右哨奇兵而以王輔督之合後則以陳遠婁子和施觀定南路陳倉楊世滕易俞一和各兵劄營山上以備策應俱於十六日卯時進發先登巢後高山俯視賊巢如在鍋底山壁削立林木箭翳山下田洋俱種甘蔗雜以荆棘不能用武各賊先瞭兵至設伏蔗林兵已逼近四面伏倭並起各兵分投格殺

血戰移時不能前進本鎮手刃退縮示衆各兵悚懼奮力相持張元勳獨馬當先部下官兵恐致有失一齊衝進賊遂披靡大敗另賊一枝徑衝山上老營欲襲兵後陳遠妻子和擁衆下山衝擊哨官李嘉珍當先戰死我兵益奮賊又大敗各兵據山四面圍合倭賊數千聚成堅陣殊死衝出兵皆盛氣以待俟賊衝至則一當其鋒一襲其後既而分突四面則四面皆然賊勢大沮棄甲曳兵突入林莽僅求身免各兵躡踪不捨各持短刀穿入

莽中各賊計無所出轉入深叢自投高崖多被我兵短器刺死縱火焚燒或又冒死登危被銃打死不下千數但屍在高深險絕首級未能盡取當時紀驗得生擒真倭四名從賊一名斬獲真倭二百五十二級從賊二級隨據生擒通事李妙供稱倭賊先在王倉坪戰敗各扶傷宵遁獨選精壯真倭四千殿後本月十三日有漳浦縣城內姦細十五名投賊獻城密說本城不可明攻須過城二十里以緩城守約於十六日夜潛回城下見今

南門外木柵未完從此襲入各人內應以白巾白衣白
旗登城為號是日遇兵剿賊計不得行姦細內一名充
總管五千大頭目下通事右目有白珠可認大頭目亦
已被殺看得蔡丕嶺之戰既冒險而殲勅敵復伐謀而
保危城衝鋒決勝則張元勳之功居多俞世隆錢助禮
王漢沈元各單身扮作鄉民深入賊壘陰伺動靜且得
虜情以故大兵徑擣深山如履熟路功亦足多哨官李
嘉珍哨長屠子和鮑仲富隊長石元等十二名兵王龍

等一十名俱血戰而死相應照例優恤及開千總倪府
斬獲倭級一顆漳浦縣鄉兵生擒真倭一名從賊一名
斬獲首級一顆盤陀嶺巡檢司官兵斬倭級一顆又鄉
兵擒獲生倭二名斬獲倭級共四顆詔安縣民快沈莆
斬獲倭級一顆百長張祖寧斬獲從賊一顆鄉兵李時
化陳紹擒斬倭賊九名顆各到道轉解軍門紀驗訖又
據詔安縣南詔所各報殺敗殘倭於十七日巳時突過
本縣帶傷投遁西省地方十八日寅時遁由雙港往廣

東地方去訖十九日酉時又零倭一夥避屯大坡本夜三更由九上落山徑投奔廣東去訖官兵追至界上各賊盡氣奔狂已越潮州而南六十里及據民快陳攸仲等路獲被掠人報稱各賊初欲遁出廣東合夥先令南賊探得潮州花腰峯等山賊蒙俞總兵招撫為兵只殘倭四百該鎮提兵一萬圍困已久又蒙兩廣軍門調發狼兵二萬前來潮州截殺各倭跋前疐後風木皆兵連夜欲奔廣東沿海地方尋船歸國及據同知譚維鼎等

呈報紀驗過功級共計五百三十六名顯等因到臣
看得蠢爾倭奴節被勾引侵擾閩地攻陷郡城彼醜雖經
蕩平內逆實多漏網乃復沿襲故智結連萬倭大舉入
寇幸而水陸多備俘馘相仍及其擁衆攻城意在必下
容兵久戍數僅相當乃能一破之仙遊再破之同安三
破之漳浦先後斬獲實級至二千有奇焚溺毒死稱是
即鼠竄狼奔僥倖無死者尚數千人而傷弓驚餌遠浙
高飛自是可無東顧之患矣且令賄賂之民日擊堂堂

之陣姦宄改慮良善安心拔本塞源端在於此目今境
內並無一賊地方以寧各部官兵掣回信地專備春汛
此皆仰仗皇上玄威有赫廟堂勝算萬全以故文武同
心將士用命遂使遊魂無所假息成功出於望外如此
所據一時宣猷效忠之臣如浙江巡撫右副都御史趙
炳然義切同舟憂深拯溺巡按福建監察御史李邦珍
隨軍紀察共蹈艱危咸為功首但皆拘於明例非臣所
敢議擬外照得都督同知戚繼光居官成而志氣愈勵

乘戰勝而智慮益精衝瘴癘之鄉冒風雪之會勞苦不暇身謀解仙遊之困伐漳浦之謀全活何可數計西賊愁聞不啻仲淹之風烈南人不反庶幾諸葛之天威比年雖已三見蕩平而此舉寔為萬代瞻仰功當首論按察使汪道昆抱經世之雄畧懷拯時之隱憂佐軍而分數甚明誓衆而人心競奮運籌決勝動中機宜轉餉給兵曾無匱乏巡視海道副使周賢宣持檄而趨信地蹈海而出畏塗兵不血刃寇已夜亡餉不違期士皆宿飽

既密于振之令亦多俘馘之功此二臣者功當次論北
路守備王如龍引刀自裁不忘死綏之義櫻鋒決戰遂
伸破竹之威把總張元勳杖馬箠以先人義不避死率
雁行而赴敵勇可冠軍功當首論者也遊擊李超守備
耿宗元受事而備嘗艱難臨敵而不辭險阻韜鈴久習
枹鼓足當泉州府同知譚維昂漳州府同知鄧士元居
帷幄而籌策無遺親矢石而紀驗有據外伸士氣內戢
人心功當次論者也把總陳濠朱九龍丁茂陳祿陳遠

婁子和蔣伯清暴以平驅兵接戰斬獲獨多俞世隆錢
助禮哨官王漢沈元伺敵入屯奸謀畢得功當並論者
也把總方伯樓大有楊世胡仲膏滕易陳倉操此奇兵
共除強寇功當通論者也其餘前後水陸官兵功罪及
應加優恤人員容臣通查明實另行題請

水陸官兵剿滅重大倭寇分別殿最請行賞罰以
勵人心疏

據監軍按察使汪道昆呈准戚總兵手本內開本鎮分

布水陸官兵防禦秋汛議照倭奴乘汛入境必須順風
自北而南即今風汛已迫錢糧不敷所議五寨兵船未
能一齊造募隨行鹽運司同知劉汝順先將近北一帶
烽火門小埕南日山三寨兵船增修新舊選將集兵比因
題設各寨把總尚未奉有欽依勘劄赴任該蒙撫按兩
院詳定以福州右衛指揮使朱璣署烽火門把總泉州
衛納級千戶傅應嘉署小埕把總各領大小兵船四十
隻浙江松門衛正千戶顧喬署南日山把總先領造完

兵船十二隻各給軍火器械月糧督發各該信地以防之於水又議得見在浙兵勞苦思歸閩省糧餉訕乏相應樽節浩費體恤羣情原議存留班兵九千名止留得兵六千四百名分為八營每營八百即以金科葉大正兵二營駐劄福寧州防守北路胡守仁統領陳應朝朱珏方其兵三營駐劄福清防守中路耿宗元統領暴以平胡仲膏俞廷秀陳倉滕易楊世俞一和等兵二營駐劄漳泉防守南路陳其可統領標兵駐劄連江翼護省

城本鎮統督趙記陳良琮兵二營往來福清等處調度以防之於陸比因漳泉內逆竊慕上年興化厚利勾引倭奴萬衆大舉入寇小埕把總傅應嘉見得竿塘海洋係賊船南下之衝分定哨官張楠李騰蛟千戶許瀚專領兵船一枝在彼防截本年十月二十三日倭船一十三隻駕到臺山海洋烽火門把總朱璣督哨官千戶陳聰兵船犁沈綉鞋船一隻本總追至東北外洋犁沈大倭船一隻焚溺倭賊二百餘徒撈斬倭級一十一顆又倭

船十餘隻駕到官澳海洋傳應嘉督哨官粘席珍兵船追至東礮外洋犁沈倭船一隻焚溺不計遇晚不能撈取首級只生擒真倭一名二十四日倭船七隻駕到本竿海洋朱璣督百戶張威兵船追至外洋犁沈大小倭船三隻沈溺倭賊三百餘徒撈斬倭級一十二名顆本日倭船一隻計賊百餘突從福寧州三沙地方登岸二十五日奔至本州東門外福寧衛掌印指揮張本等不行出擊分守道金澍調督金科葉大正部兵截殺守

備羅章督陣賊懼奔遯池嶼地方金科當前葉大正尾擊共斬獲倭級四十九顆餘賊五十餘徒奔入民房官兵放火燒死盡絕本日大倭船一隻約賊百名登犯長樂縣大址地方附近鎮東衛掌印指揮劉師錡管操指揮戴一袞各不出擊二十六日把總胡守仁統督朱珏方其等兵追至大石坵地方擒斬倭級八十四名顆南日署把總顧喬督兵登岼協戰斬獲倭級二顆餘賊數名散遯把守嶺口鎮東衛千戶商昇斬獲倭級四顆福

清縣鄉兵林桂廣林公成長樂縣兵陳孔相零斬倭級
共四顆把總陳其可下千總魏文舉等出哨蘓溪地方
斬獲倭級一顆本日倭船一十六隻在臺山海洋朱璣
督駕陳璉張威馬雲鵬兵船追至七星海洋犁沈大小船
八隻撈斬倭級一十三顆生擒真倭二十三名焚溺不
計又倭船一隻突至漳浦縣青山巡檢司下南風灣住
係銅山把總常江信地失於堵截以致登岼附近鎮海
衛掌印指揮周祥不行出擊被各鄉兵阻殺夜遁廣東

地方詔安縣知縣梁士楚會同原任守備王道成督兵
追至饒平古篤寨共斬倭級七顆從賊五顆本日倭船
七隻登岼福清縣石坵澳又一隻登犯萬安所連盤澳
共計倭賊二千係南日署把總顧喬信地本鎮即督趙
記陳良琮等兵與軍門發到名色把總楊文等標兵馳
至福清與胡守仁朱珏方其陳應朝部兵合營料賊必
由上徑南奔二十八日夜出兵埋伏漁溪次早賊果過
橋我兵舉砲發伏一齊衝殺倭賊敗走自相踐踏下水

二三百餘隨潮漂出外海止斬前鋒倭賊首級九十二顆餘賊殊死奪路往南去訖軍門看得南北飛報倭賊數多浙兵分屯戍守見在出戰不過五千多寡不敵隨差泉州府推官鍾崇文行都司都事何季春齋帶安家銀兩前赴浙江催取上班官兵兼程赴閩及親統把總陳其可蔣伯清等標兵馳至福清與本鎮會議戰守本日倭船三隻在東礮外洋行使小捏把總傅應嘉督哨官李騰蛟張楠等兵船追至白犬外洋適遇大艚倭船二

十隻兵船併力攻打犂沈倭船八隻焚溺不計生擒真倭三十五名撈斬倭級一十七顆又倭船三隻突至福寧州舊水澳倭賊一半護船一半登岬係千戶劉梲百戶馬雲鵬信地該分守建寧道調度把總朱璣督令二哨官捕掣船埋伏調水兵為陸兵登山納喊前賊驚懼開遯外洋去訖又有倭船二隻弓鞋船二隻登犯興化吉了澳又大倭船一十二隻登犯平海衛南哨澳俱係南日署把總顧喬信地比因船少兵寡不能堵截又倭

船一隻登犯惠安縣西港該縣典史張承吉督兵截殺
斬獲倭級八顆奪回被虜一十六名又倭船三隻突到
晉江州上澳係浯嶼水寨把總鄧一桂信地失於堵截
以致登岬附近永寧衛指揮余昂劉維垣千戶張克椿
百戶陳鎰各不出擊前賊流突南安縣學前地方都指
揮耿宗元下副總滕易楊世等兵連夜追至斬獲倭級
二十九顆泉州衛指揮百希周帶民兵協戰斬級百顆餘
賊散遁滕易下哨兵於西店斬獲倭級一顆南安縣鄉

兵曾思遜曾體明安海堡鄉兵曾元晉江縣義總謝愛
夫各零斬倭級一顆三十日有雙桅船六隻到平海後
番澳登岼又倭船一十隻在星門海洋行使該把總顧
喬督哨官陳伯秀張榕等兵船追至東山井門外洋犁
沈倭船六隻生擒真倭一十七名撈斬倭級三十七顆
溺死不計又倭船三隻約賊四百餘徒突到福寧州閭
峽澳係千戶崔應朝信地失於堵截以致登岸建寧道
督發把總金科葉大正部兵追至漁洋交鋒用銃打死

數賊路險兵疲不能收功只斬獲倭級一顆餘賊奔遁
南屏十一月初一日倭船一十六隻約賊二千登犯興
化青山巡檢司石城後澳初二日倭船一隻登犯晉江
烏潯巡檢司合夥屯住內坑地方俱係浯嶼寨把總鄧
一桂附近福全千戶張克椿百戶陳鎧不行出擊都指
揮耿宗元將部兵分布哨道以副總蔣思胡仲膏俞一
和等兵為前鋒俞廷秀陳倉兵為左右翼三路齊進俞
仲膏奮勇當先共擒斬倭級七十五名餘賊奔遯本日

倭船一隻賊一百五十餘徒突至福寧州田澳係千戶
崔應朝信地不能堵截以致登岬聞知漁洋有兵即由
海邊奔往南屏與前閩峽賊合夥遁過福安寧德地方
又倭船五隻約賊三百餘徒從竿塘安海澳突至連江
東岱澳因哨官張楠李騰蛟千戶許瀚兵船不遵該寨
調度避泊內澳不能阻截賊人登岬俱向南奔軍門料
度各賊結聚南路勢必覬覦城池初四日提兵南下預
發鎮撫葉應春千總揭宇授以守城方略帶兵二百名

入仙遊縣城協守及行泉州府惠安南安等縣與沿海
衛所各張兵威加謹防守初六日倭船一隻登犯惠安
小岞地方乘夜突到東關外本縣督鄉兵曾凌徵等斬
獲倭級六顆餘賊奔向楓亭地方合夥真倭實有萬餘
分劄四面環攻四門探知我兵在近賊營連絡並不分
夥止可正兵直擣難用奇兵而我兵數少賊一倍未可
議戰軍門調發守備胡守仁把總蔣伯清等前去近縣
鉄山據險為壘與賊相持以牽其勢十一日連江縣東

岱登岬倭賊遁至玻璃嶺欲往仙遊合鯨本鎮預發把
總朱珏陳良琮趙記等兵在彼接戰斬獲先鋒倭級三
顆餘倭遯往涵頭復出新浦軍門調發陳其可蔣伯清
楊文部兵截殺斬獲倭級二百三十六顆盡絕訖十七
日倭船一隻至南日山後烽澳攔淺打破十八日有倭
賊十八名登岸欲入仙遊招夥救援守備胡守仁統領
方其部兵於酒林地方截殺斬級一十八顆餘倭屯住
南日山該監軍道督行把總顧喬千戶張應龍哨官錢

國明平海衛指揮丘昂實水陸攻剽顧喬水兵共斬倭
級三十四顆生擒真倭一十八名丘昂實家丁丘章等
斬獲倭級三顆生擒真倭三名小埕把總傅應嘉奉調
駕船至南日澳遇見前賊哨官許瀚督兵協剿斬獲倭
級四顆散遁殘倭逃伏山谷陸續被倉官謝鏗於江口
千總屈允舍人王世榮兵陳討鄉兵楊瀛蘇樹各斬倭
級一顆鄉兵陳烏二擒倭二名陳文明林宗達方貴華
張宜長林希尹指揮丘昂實各擒倭一名共計擒斬一

十五名顆福寧州原遯寧德倭賊突入古田地方守坑
百戶吳彪督鄉兵陳詩七等斬獲倭級一顆本鎮哨探
親兵沈賢同鄉兵王明等斬獲倭級二顆該縣典史李
權領機兵林應明等擒倭一名斬獲倭級一顆通計五
名顆餘賊遯到仙遊合夥軍門又行小埕把總傅應嘉
將水兵選充陸兵募足三千名并調原任叅將侯熙募
兵二千五百名分布泉州等處防賊南遯賊乘我兵未
集攻圍益急仙遊縣知縣陳大有典史陳賢白嶺巡檢

司巡檢殷恭晝夜登陴誓與居民效死同守本鎮據報
城內急缺火藥節發哨官高太平武生龔騰霄王如麒
親兵鄭希等一百八十人陸續潛帶火藥火箭絕城送
進即協戰守本鎮親率輕兵劄營石馬逼近賊巢四面
張疑以緩賊勢初六日賊衆攻城知縣陳大有督同典
史陳賢各帶家丁及生員施大銓俱立堞口矢石並下
賊多選鋒擁至西北水關砍倒木柵控開土城用銃攻
打甚急各官併力拒守知縣家丁陳二與施大銓及兵

夫林志寬俱被銃打死塚下賊即豎梯登塚兵夫吳育
劉君芳丘世修奮勇砍死數賊墜城劉君芳亦被殺死
城外遊兵李以仁放火焚毀竹牌木梯賊勢稍却又聞
本鎮部兵吶喊放銃賊疑兵進遂即解圍十一日倭船
七隻在於鷺鷥海洋行使把總顧喬督兵船追至烏姑
外洋犁沈倭船三隻溺死倭賊四百餘徒斬獲倭級二
十一顆十六日推官鍾崇文都事何季春同原押兵把
總陳濠縣丞陳永催督守備王如龍官兵到省尋該遊

擊將軍李超即赴兵營調度分布哨道剋期進剿以王如龍統楊世潮丁茂朱九龍為中左路胡守仁統方其陳應朝朱洪婁國華為中右路取賊南巢陳濠督陳祿陳文澄童子明張元勳為左翼取賊東巢遊擊陳其可蔣伯清楊文為右翼取賊西巢金科督陳良琮葉大正為大營正兵專備策應指揮呂崇舟副總金文秀領都司郭成下苗兵及軍門標兵一枝張疑鉄山以牽北巢之賊傳應嘉取道西嶺以拊西賊之背機宜號令一聽

總兵但總論成功各哨不許爭取首級悞事二十六日
平明自新嶺發行辰時到仙遊城下倭賊正在攻城製
造呂公車八座高踰城堞丈許三面用竹木綿毯遮蔽
於內層層布梯藏倭百數用輾輪推近城堞止離二尺
車頂另架飛橋度越女牆城中士民危在頃刻守備王
如龍率兵直衝南巢倭賊結陣出迎我兵奮勇衝殺胡
守仁督兵齊進賊敗入巢各官兵砍開木城圍燒巢屋
戮死倭賊四百餘徒遵約不取首級聽其燒毀賊奔東

巢陳濠督兵攻破東巢王如龍乘勝直擣李超蔣伯清等夾攻喊聲震天殺死倭賊一千有餘頃刻三巢俱焚賊衆慌懼併為一枝衝出我兵奮力死戰賊方敗遁救出各巢被擄男婦二千餘名口除焚燒倭賊不堪取級外見斬倭級五百顆本鎮隨賊追擊賊遁同安縣坂尾地方沿途被知縣陳大有督家丁斬獲倭級七顆詔安縣知縣梁士楚南詔所百戶張鳳翥督家丁梁錫舍人張鳳來等擒倭四名斬獲倭級四顆賊級一顆各家兵

等斬獲倭級有差共計擒斬倭級五十四名顆餘賊一夥遁住廣地方去訖尚有殘倭散匿山谷本鎮仍令各該官兵多方搜捕千戶孟松把總陳倉千總劉朝鄉兵林益祥等共勦剿五十一名顆四境山谷搜捕殆盡居民安業前後通計水陸官兵斬殺倭賊除焚溺者三千有奇不計外見在擒斬賊級共二千一十七名顆通計陣亡在池嶼則隊長吳奎等三名在大石則隊長孫文玉等十一名在上逕則哨長裘子成等二十七名在仙

遊則把總童子明等二十四名在蔡坡嶺則哨官李嘉珍等二十七名標下百總何拱兵王川等五名煩將有功者議請陞賞以勵士心有罪者查叅究治以明軍法陣亡者厚加優恤以勸將來等因臣看得比年徵調浙兵剿平海寇往往以衆取勝一戰成功寇靡孑遺雖國威已伸而島奴未知賊膽未落乃今引倭大舉擁衆內侵意在抗我積威逞彼故智假令拘於常調時必持久而後集兵必相當而後戰境內之事將不支矣伏荷皇

上神威默運於九重神武光昭於四表執政操衡本兵
握算餼糧發天府之儲部曲盡人官之選而浙江巡撫
右都御史趙炳然共懷攘夷安夏之心拯援備至巡按
福建監察御史李邦珍誼切同舟共濟之義操切得宜
以故事無掣肘人皆用命乃能用寡擊衆一呼而輒解
重圍以正為奇三戰而悉收全捷使其駢肩就戮盡氣狂
奔威如破竹草木皆兵振若發蒙僵尸盈野非惟虢外
邦之魄抑亦寢內逆之謀蓋自東南用兵以來軍威未

有若此之震軍功未有若此之奇者也照得都督同知
戚繼光精忠殉國妙略通神官成而志不渝戰勝而機
益密徹桑於陰雨之先預事而立射隼於高墉之上好謀
而成俘馘何啻千羣勞苦豈云萬狀部中賴其保障
居然衣冠文物之故鄉海外憚其威稜久矣禮義詩書
之宿將宜加上賞用答元功監軍按察使汪道昆才誠
相合軍旅素諳馭衆而動有成規決勝而算無遺策以
文事而兼武備人望共推自經始以至成功心思既竭

參政劉佃參議金澗海道副使周賢宣兵備僉事李儒
烈任勞任事足食足兵鼓舞允愜乎下情發蹤先得乎
上策軍功併著民譽攸歸以上六員陞賞出自上裁未
敢輕議其餘文武職官功罪等第相應甄別以備懲勸
以武職言之北路守備王如龍引刀自決鼓衆志以立
奇功名色把總張元勲策馬前驅突重圍而摧勅敵烽
火門把總朱璣當全省之襟喉地遠而勞績獨著南日
山把總顧喬值羣倭之輻輳兵少而斬獲獨多功當首

論者也南路守備耿宗元孤軍而保遐服寇無停留遊擊將軍李超單騎而入行營師有統馭名色把總朱九龍丁茂楊大解仙遊之圍其勇足尚標兵把總陳其可蔣伯清殲新浦之寇其績尤竒方其胡仲膏秉螫弧而踴躍先登孫廷賢錢助禮俞世隆張買王漢探虎穴而偵候不爽哨官高太平冒死而入危城至於傷損鎮撫葉應春千總揭宇協力以拒強寇幸而保全功當次論者也中路守備胡守仁上徑之發伏稍失機宜大石之

摧鋒足占勇略小埕水寨把總傅應嘉竿塘編網之愆
不無可議白犬截流之殺亦有足多功當併論者也名
色把總暴以平陳祿陳應朝楊世潮方伯樓大有副總
胡世何十之勝易均之能效一旅之勞收累戰之勝中
軍名色把總吳京崔經王輔指揮盧昂臣千戶徐棠及
浙江軍門千戶胡奎贊畫生員金丈通均之盡驅馳之
力佐蕩寇之功所當通論者也通計水陸之功當致難
易之辨言破敵則水易而陸難言取級則水難而陸易蓋

截海揚帆幾不容間艤舟馘首勢不可留以故賊溺舟
沉百無一得且在陸則賊雖殲滅其傷必多在水則賊
既淪亡其惡未播此當以難易論不當以多寡論者也
至於銅山水寨把總常江浯嶼水寨把總鄧一桂則視
寨務而弁髦以舟師為家橐將在軍而孤舟徑入難辭縱
寇之愆賊臨境而一報不聞寧免失機之罪所當重究
者也福寧衛指揮張本鎮東指揮劉師錡戴一衮永寧
衛指揮余昂劉維垣福全所千戶張克椿百戶陳鎰鎮

海衛指揮周祥叨恭養之深恩任封疆之重寄登犯不
滿百人束手不能出擊相去不過一舍櫻城若罔聞知
所當併究者也烽火門哨官崔應朝防禦不嚴致狡夷
之深入小捏哨官張楠李騰蛟許瀚違令自便棄信地
而不居陸梁之寇雖已誅夷而踈虞之罪亦當追論所
當通究者也中軍把總金科葉大正始收池嶼之功卒
失漁洋之利名色把總趙記逐寇於上徑橋傷於銳進
朱珏禦賊於玻璆嶺憚於窮追其罪固不容辭而其功

亦不容掩所當免究者也以文職言之仙遊縣知縣陳大有當新任而適值難危輒倡效死之義典史陳賢巡檢殷恭居卑官而不畏強禦亦著全城之功鹽運司同知劉汝順捐俸以濟公事苦節可貞竭力以佐戎機膚功累奏泉州府推官鍾崇文力不恤乎獨勞克勤王事才復優於專對不失師期已上五員功當首論內陳大有陳賢殷恭資格稍異宜破格而超遷劉汝順鍾崇文年資不同宜循資而大用者也福州府知府胡帛通才

應務居繁劇而事事有章泉州府同知譚維昂志臨
戎倡勇敢而人人作氣福清縣丞陳永馳驅靡寧而才
有實用南平縣縣丞王繼祖出納惟允而人無間言所
當優論者也給餉則興化府知府易道諱泉州府知府
周道光漳州府同知劉宗寅福州府通判任良翰侯官
縣知縣任春元福清縣知縣督應元浦城縣知縣林萬
春紀功則漳州府同知鄧士元莆田縣知縣莫天賦幹
濟則詔安縣知縣梁士楚行都司都事何季春都司司

獄丁汝止萬安倉倉官聞鑽均之協心而任事隨事而效勞所當併論者也陣亡名色把總義烏縣吏童子明哨官楊世傑李嘉珍生員施大銓百總何拱哨長裘子成等十五名隊長吳奎等五十三名兵王全王川等二十一名機兵劉君芳等三名要皆屢戰立功以身殉義所當分別等第照例贈廕優恤者也其餘各部獲功人員應照覈冊陞賞通候紀功御史查明題請施行庶幾謹舉當而功罪自明賞罰行而懲勸斯得人心思奮而武

備並修矣。

海寇已寧比例陳情懇乞天恩俯容補制以廣聖

孝疏

嘉靖四十年三月十九日臣以參政丁父憂回籍守制
至本年十一月間伏蒙聖恩起臣原職領浙兵往江西
殺賊至四十一年九月間賊平具奏終制未幾又以倭
賊攻臨興化府城又蒙聖恩起臣原職領浙兵往福建
殺賊尋授臣節鉞時計臣父之喪甫及大祥烏鳥之私

缺然未盡而不敢以請者竊念皇上所以奪臣於縲絏之中誠以福建之寇頗著猖狂故以金革之事責之於臣而臣不敢不强起任事計事竣且得請耳乃自夏徂秋山海之寇業已次第蕩平臣因具疏陳乞補制庶幾公義私恩兩無所憾顧疏發未幾而警報復至臣又差人追回捐軀事敵茲荷皇上玄威廣運二萬之寇被我水陸掩殺福建地方已幸平寧且善後皆有成議文武不至乏人臣亦可藉是以仰荅明命於萬分之一矣臣

惟我朝成憲凡人子執親之喪皆不計閏二十七個月
夫官吏給由必計閏而守制則不計閏者蓋推人子無
窮之心雖加一日愈于己之意此我太祖高皇帝以孝
治天下所以立人極開太平於萬萬世也近該吏部題
奉欽依今後內外官員凡遇本生父母亡故許給假回
籍治喪夫我朝令甲無為本生父母給假治喪之例而
今乃得以遂其情事者此又我皇上以孝治天下所以
立人極開太平於萬萬世也伏念臣亦人子也遭臣父

之喪雖已服除然臣居苦塊前後纔十四月耳餘皆在
墨縗之中夫起復墨縗既已居位而食祿矣固非閏月
之比而身為人子又與為後者有間乃貪位嗜進不一
哀訴於君父之前以求盡一日之私則在臣父猶無子
而於臣心為無親臣復何面日立於皇上盡倫盡制之
朝乎臣用是跼蹙弗安故敢援例陳請伏望皇上憫臣
缺然未盡之情無所解於其心之私勅下該部查照不
計閏之例放臣回籍補制制終之日赴湯蹈火惟陛下

所命臣不敢愛此犬馬之軀以仰負覆載生成之厚仍乞以此比照為本生父母給假之例著為令甲永垂遵守如此則皇上議禮制度信乎建諸天地質諸鬼神考諸太祖而有光傳之萬萬世而為法矣臣不勝感戴戰慄之至

條陳善後未盡事宜以備遠略以圖治安疏

臣惟決策於多事之秋則必有權宜之術而圖治於安平之後又必有經常之規福建之事至壬戌癸亥變已

極矣故臣於上年所以經畫而措置者自五寨三路之外皆為一切權宜之計以紓目前之急今則仰藉皇上聖武事固稍稍定矣而臣又以補制得代若不圖為經常之規以為久安長治之計則名將不可以多得客兵不可以常恃內帑不可以時出而覆轍相尋後將何賴臣用是大懼行將出境不能解於其懷所以上酬陛下委寄之重下答閩人仰望之殷蓋有六事焉敢條列以獻誠自知為九九之術然愚者一得不勝芹曝之私伏

乞勅下該部再加看詳如果芻蕘可采略見施行則地方幸甚臣愚幸甚

一曰議將

夫今日閩中大將有如總兵戚繼光者亦可謂名世之英無以尚矣如遊擊如三路五寨既多得人即有一二未稱又取諸軍中而具足則固無容多議矣但臣之先題止詳於海寇而未及處閩廣之寇審於客兵而未遑練本省之兵今則欲兼而舉

之始知其所未盡譬之學然後知其不足也且以八閩之機務總萃於戚繼光之一身此憂勞所以成疾而精力屢以告疲於是增設戶將之議紛紛然起矣臣有說焉福建有都行二司備員六人果盡堪軍旅之寄則此六人者固皆大將也為今之計謂宜勅下該部轉行撫按衙門會同總兵官戚繼光將都行二司見任堂上官從公考察具奏去留即許於軍中查舉才勇素著資望相應者聽

該部照缺推補載之鎮巡冊書隨宜委用於內仍
銓註訓練主兵都司二員務得人如守備胡守仁
把總傅應嘉當之如此則官不必備而分任有人
事得其理而成務可振矣伏乞聖裁

二曰議兵

臣嘗聞之見兔而顧犬未為晚也忘年而補牢未
為遲也福建之兵所以不足用者為其積弱也為
其未練也臣嘗練之而又病於未專也夫未練與

練而未專則均謂之無兵也亦宜是客兵之調終不可罷然而非策矣為今之計宜取各縣團操民壯之半與各巡司弓兵之應故事者查照客兵事體自額設工食之外仍聽巡撫衙門以軍餉增給月足口糧一兩盡集之省會分為二營務足三千二百人聽練兵都司分統訓練即因以課都司之督否而賞罰之兵有弗堪則奪其食另於邊海取壯健充補數有弗及即動支軍餉募而足之每營

必以三千二百人為成數教之三月而成列六月而藝精一年則屢小試之而有勇知方乃又擴而增之而漸減客兵之半至於盡罷客兵而止但軍旅之事法尚威嚴而訓練之初易生謗怨必欲成節制之師為安攘之助須撫按諸臣與練兵都司身任其節真能一國非之而不顧衆人議之而愈堅務使總兵之令得行於都司都司之令得行於把總把總之令得行於哨官哨官之令得行於隊

長隊長之令得行於部卒自上而下體統森然自下而上略無阻撓凡在武場之中得以軍法從事必兵皆畏將權不下移如臣與戚繼光在浙東時然如是而練兵不精臣未信也若安常習故憂讒畏譏徒擁兵權僅同兒戲如是而練兵有成臣亦未信也此在今日為閩中第一急務如七年之病求三年之艾苟為不蓄終身不得臣請自今蓄之也伏乞聖裁

三曰議食

福建之患所以一甚至此者其弊固始於無兵而其源尤起於無食興化之變全閩且騷然動矣自非仰仗皇上帝破常格屢發內帑極力拯援則閩之為閩未可知也夫救患於將然則事半而功倍圖事於既去則所費不貲而未必能濟今閩事甫定寇情叵測備未可以少弛兵不能以不練若不先為足食之謀則臨渴掘井嗟又何及臣嘗反覆

計之福建賦稅未入於朝廷其為數亦夥矣夫以
惟正之供則如彼仰給之意又如此臣子之心真
有岌然不能自靖者然臣又竊思焉此賦也此稅
也皆出之於土地人民也今土地則荒蕪矣人民
則離散矣豈惟離散又聚而為盜賊而賦稅亦無
所于供如此則曷若且以福建之賦稅平福建之
禍患定以五年為率禍患果已盡平人民果以盡
安土地果已盡闢賦稅果有所輸則仍行盡數起

解如此則公私具利而上下並受其福不然是寸有所吝而尺有所遺臣不知其可也且福建為山海之區財源素狹以通省計之不及江浙一大郡今即請留秋折屯折鹽折每歲除興化一府寧德等縣蠲免外僅可得銀一十萬兩不逮額餉三分之一其不足之數雖徧加搜括亦惟糧剩銀之三萬鹽鈔另派扣出料銀之二萬八千如此而已其於原題歲計三十二萬猶欠一十六萬有奇尚不

免別有陳乞若又謂秋糧折銀決不可留則其為數益寡即定以五年之期與臣今年有實探力索儲以預待亦纔足二年之用將來事勢益不可支而惟正之供亦同歸於逋負而已矣再照全閩之地被患極甚拖欠極多加以有司催科無法項項取盈事未及濟而民已先病且去而為盜矣臣愚謂宜且緩其舊欠而嚴其新徵責之年完一年庶幾用其一而緩其二財用有所出而民生亦不苦矣

伏乞聖裁

四曰議有司

臣惟生民之休戚係於守令賢否而令於民親其職為尤重福建列縣屬在山海之間素號簡僻然而山川險阻地方綿廣加以近年風俗薄惡豪右縱橫最稱難治在昔縣令雖未盡為甲科而尚十居三四今則一省纔得五人耳餘皆來自舉監教職且強半為江廣之產此銓曹就近用人謂於土

俗民情相習固美意良法但江廣雖稱多才豈必人人皆善舉監教職固有卓異英賢超出風塵之外然而委靡弗振以資格而自廢者則十嘗六七又所處非善地重以時艱詎惟無遠志且無固心焉即有所謂卓異英賢超出風塵之外者亦僅以清白自守圖惟安靜苟免謗訕如是而已至於任怨任事能與斯民痛癢相關者則求什百於千萬而絕無其人此賦役不均刑罰不中民生日病盜

賊日滋逋負日盛法紀日頽理有固然勢將何極
臣甚憂之謂當此大計羣吏之時亟為更置而補
以科甲之英與揀選人才之俊仍乞天語丁寧撫
按官自是嚴加甄別但係賢能一體舉薦不許較
量資格在進士則挽之惟恐不及於舉監之賢則
隱而弗彰而又博選於四方不專取於江廣如此
則百察思奮而地方有攸賴矣伏乞聖裁

五曰寬海禁

臣惟中外之分界限不可不嚴而貨利之津人情實不可壅宋臣蘇軾謂宜以不治治之臣嘗愛其說以為得馭戎狄之至要况閩人濱海而居者不知其凡幾也大抵非為生於海則不得食海上之國方千里者不知凡幾也無中國綾錦絲象之物則不可以為國禁之愈嚴則其值愈厚而趨之者愈衆私通不得即攘奪隨之昔人謂樊源如鼠穴也須留一箇若還都塞了好處俱穿破意正如此今豈

惟外洋即本處魚鰕之利與廣東販米之商漳州白糖皆一切禁罷則有無何所於通衣食何所從出如之何不相率而勾引為盜也為今之計正宜嚴禁日本不許私通外其他如採捕魚鮮貿易米穀與在廣東轉販椒木漳州發賣白糖之類悉宜如臣近日將各府單桅船隻定為號色編立保伍聽於附近海洋從便生理之意推廣而行但有勾引事發乃行連坐重治如此雖未必盡無法外之

遺姦但天下之事豈有皆利而無害惟當權其分數之多寡使為賊者半為商者半或為商者十之七為賊者十之三則彼之分數既減而我之致力亦易不愈於相率而共為盜乎第其事多變通法難執一如蒙勅下該部再加看詳轉行福建撫臣就近酌處便宜行事惟取其有裨於成算不必淆亂於人言則小人之衣食有寄而地方之禍患有消矣伏乞聖裁

六曰增設縣治

福建山民往往嘯聚為盜至父子相繼莫之誰何
蓋自昔而然矣其故蓋起於山川險阻地理綿曠
距縣寫遠政令莫及即大加征剝率無過四五十
年而不復叛者且每一用兵小費則數萬大則數
十萬載在故牒厯厯可數至如汀州之溪南漳平
之和睦集賢二里與寧德之東洋則其甚者蓋皆
在諸府各縣之交有如三窟可以藏避必欲為久

安長治之計僉謂設縣最便為溪南則宜縣於河
埠如先任南贛巡撫都御史陸穩所題在和睦集
賢則宜縣於東西坑巡檢司在東洋則宜就本處
為縣治先年僉事舒春芳已嘗為之堡矣且民情
亦所樂趨而久議未定緣惜小費而不念用兵之
費則當幾倍於此也或又謂糧額太狹即臣請無
論起運但穀存留則亦不病于狹如蒙勅下該部
再加詳看如河埠則處置已備即請欽賜縣名開

設衙宇建立城池學宮選官從事似無他疑至如
東西坑東洋二處須再行撫按將各地方備細分
割一切事體處置周詳具奏施行如此則兵不血
刃盜息民安而陛下永無南顧之慮矣臣不勝懇
切祈望之至伏乞聖裁



譚襄敏奏議卷二